

Vatan yagonadir,
Vatan bittadir!

N:15 (67024)
2015-yil
13-aprel

Tong yulduzi

www.tongyulduzi.uz

Gazeta 1929-yil 1-avgustdan chiqq boshlagan

O'zbekiston Respublikasi bolalar va o'smirlar gazetasi

ISSN – 2010-6092



Qoraqalpog'istonlik
yoshlarning quvonchi cheksiz.
Nega, deysizmi?..
Bu haqda 2-betda o'qiysiz.

Mamlakatimizda har yili an'anaviy tarzda o'tkazib kelina-
yotgan «Yilning eng yaxshi fan o'qituvchisi» ko'rik-tanlovi
tashabbuskor pedagoglarni kashf etmoqda.
Jizzax viloyati, Zafarobod tumanidagi 8-umumta'lim mak-
tabining fransuz tili o'qituvchisi Dildora Rasulova «Yilning
eng yaxshi fan o'qituvchisi – 2015», deb e'tirof etildi.

(Davomi 2-betda)

Yorug' manzillarga yo'l olding – shodmiz,
Kelajak oldida mas'ul avlodmiz,
Farzandmiz, ona yurt, senga najotmiz,
Faqat bizga ishon, ishongin, Vatan!



O'zbekiston xalq shoiri Zulfiyaxonim hayoti va ijodi haqidagi filmda
uning bolaligi obrazini yaratgan qizaloq e'tiborimni tortdi va u bilan
yaqindan tanishish istagi tug'ildi. Samirabonu ismli bu qiz latif shoira-
mizning evarasi ekanligini bilgach, beixtiyor quyidagi misralar
xayolimdan o'tdi:

Mening hayot bog'im qolmas huvillab...

4-bet

Ko'zlaringda
cheksiz hayajon,
Baxtiyorsan,
Izzatillajon!

H. HAMIDULLAYEV o'lgan surat



ZAFAROBODLIK ustoz zafari

(Davomi. Boshi 1-betda)

Tanlovning birinchi bosqichida 14 nafar qatnashchidan 6 kishi navbatdagi bosqichda ishtirok etish imkoniyatini qo'lga kiritdi. Ikkinchi kun... Fransuz tili o'qituvchilari bu galgi shart bo'yicha Toshkent shahrining Uchtepa tumanidagi 74-umumta'lim maktabining 5-sinf o'quvchilariga dars berishda o'z mahoratlarini namoyish etishi kerak edi.

Iqtidorli ustoz darsni har doimgiday noan'anaviy tarzda tashkillashtirdi. «So'zlar qutisi», «Eslab qoling», «Bingo», «Qo'ng'iz» hamda «Nomini toping» innovatsion texnologiya asosida qurilgan dars o'quvchilarda katta taassurot qoldirdi. Tahlil natijalari zafarobodlik o'qituvchining muvaffaqiyatini ko'rsatdi...

Ustozning yutug'i shunda ediki, dars jarayonida o'zi emas, ko'proq o'quvchilarning faolligi kuzatildi. Bu esa, o'z navbatida, mavzuning mukammal o'zlashtirilishiga omildir.

O'z fani mutaxassisi sifatida respublikada mutlaq g'oliblikni qo'lga kiritgan muallima «Fransuz tilida muloqot bo'lmagan sharoitda ta'lim oluvchi o'quvchilarga xorijiy tilni o'qitishni rivojlantirish» mavzusida tadqiqot ishini olib borar ekan, faoliyatida yunon faylasufi Epidritning «O'qitish ikki barobar o'qish, demakdir» fikriga amal qiladi. Hayotdagi shiori: «Bilim faqat undan unumli foydalanilgandagina ahamiyatlidir».

– Bellashuv davomida bir-birlarimizdan alohida jihatlarni o'rgandik, tajriba almashdik. Eng asosiysi, biz raqib emas, hamkasb sifatida ishtirok etdik, shartlarni bajarishda bir-birimizga ko'maklashdik, – deydi ustoz.

– Bugungi kunda o'z veb-saytiga ega muallima respublikamizdagi hamkasblariga metodik qo'llanma va tavsiyalarini taqdim etadi.

Feruza SOYIBJON qizi

Kitobli uy – Quyoshli uy

(Davomi. Boshi 1-betda)

Navqiron Nukus shahrining Istiqlol bolalar yozgi dam olish markazida barpo etilgan «Bolalar kutubxonasi» binosining ochilish marosimiga bag'ishlangan tadbir o'quvchilarning xotirasida bir umr qolsa, ajabmas. Yangi kutubxona barcha shart-sharoitlarga ega. Maskanda 32 ta kompyuter, 19 ta kitob uchun stellajlar o'rnatilgan va barcha kompyuterlar lokal tarmoqqa ulangan. Kutubxona foyesida Wi-Fi internet zona o'rnatilgan. Ziyo maskanining kitob fondini to'ldirish uchun O'zbekiston Respublikasidagi barcha nashriyotlardan 5826 dona kitoblar sovg'a qilindi.

Tadbirda Qoraqalpog'iston Respublikasi Xalq ta'limi vaziri (v.b.) D.Otarbayev so'zga chiqib, bugungi yoshlar ma'naviyatining shakllanishida kitobning o'rni beqiyos ekanligi to'g'risida alohida to'xtaldi.



Qoraqalpog' Davlat universiteti qoshidagi 1-akademik litseyning 2-bosqich o'quvchisi, Zulfiya nomidagi Davlat mukofoti sovrindori Sh.Bazarbayeva, Qoraqalpog'iston Respublikasi Yozuvchilar uyushmasi a'zosi, bolalar yozuvchisi A.Atajanov, Nukus shahar

YOSH MUSIQACHILARIMIZ MUVAFFAQIYATI

Italiya poytaxti Rim shahrida bo'lib o'tgan «Primavera romana» II xalqaro musiqa ko'rik-tanlovida bir guruh o'quvchilarimiz g'oliblikni qo'lga kiritdi.

Tanlovda MDH mamlakatlari, Fransiya, Yaponiya, Janubiy Koreya, Xitoydan kelgan yosh musiqachilar o'z qobiliyatini sinovdan o'tkazdi. Toshkent viloyati, Chirchiq shahridagi 7-bolalar musiqa va san'at maktabi o'quvchilari Lola Inkarova, Mariya Vaxrusheva, David Pogosyan fortepyano ijrosi bo'yicha, Sulaymon Alimov saksofonda, Lenara Zokirova akademik xonandalik bo'yicha birinchi o'ringa sazovor bo'ldi. Meyrijan Karamanov hamda Jangali Aqlov akademik xonandalik bo'yicha ikkinchi o'ringa munosib topildi.

– Bu o'quvchilarimizning ilk yutug'i emas, – deydi maktab direktori Gulnora Nurmatova. – Ular avvalgi yillarda ham Fransiya, Italiya, Chexiya kabi davlatlarda o'tkazilgan yosh musiqachilar

tanlovlarida sovrinli o'rinlarni qo'lga kiritishgan edi.

Yaqinda Qozon shahrida o'tkazilgan «Живой родник» deb nomlangan VI xalqaro festivalda ham yurtimiz yoshlari munosib ishtirok etdi. Ikki bosqichda bo'lib o'tgan tanlovda qatnashchilar o'z bilim va mahoratini namoyish etdi. Tanlov natijalariga ko'ra poytaxtimizning Glier nomidagi Respublika ixtisoslashtirilgan musiqa akademik litseyining 10 nafar o'quvchisi birinchi o'ringa loyiq, deya topildi.

Bularning barchasi mamlakatimizda yoshlar kamoloti, ma'naviyatini yuksaltirish, barkamol insonlar etib voyaga yetkazish yo'lida ko'rsatilayotgan cheksiz mehr va e'tiborning amaliy samarasidir.

Jamshid KAMOL

APREL – MEHNAT TA'LIMI FANI OYLIGI

Buvin bir kuni menga qo'lda tikilgan zar popopli so'zanani ko'rsatib, «Mana buni sening yoshingda o'z qo'llarim bilan tikkanman», dedilar. Uning har bir guliga mehr qo'shib tikilgani bir qarashdayoq bilinadi.

Men ham buvin singari chiroyli kashtalar tikishni oldimga maqsad qilib qo'ydim. Bu haqda mehnat ta'limi fani ustozimiz Malohat opaga aytganimga, menga yordam berishlarini aytdilar. Mana, bir necha yildirki, ustozimiz milliy kashtachilik, munchoqlardan turli buyumlar yasash, pazandachilik, tikish-u to'qishning sirlarini o'rgatib kelmoqdalar.

– Mehnat ta'limi fani oyligida qo'lda yasalgan buyumlardan ko'rgazma tashkil qilamiz. Tayyorlagan ishlarimiz hay'at a'zolari tomonidan baholanadi. Shuning uchun bor mahoratingizni ishga soling, g'olib bo'lish o'z qo'lingizda, – deydi ustozimiz.

Maktabimizda fan oyligi doirasida turli tadbirlar, bellashuvlar o'tkazilishi mehnat ta'limi faniga yanada mehrimizni oshiradi.

O'dina SAHOBIDDIN qizi, poytaxtimizning Yunusobod tumanidagi 96-umumta'lim maktabining 8-«A» sinf o'quvchisi



31-Respublika davlat ixtisoslashtirilgan umumta'lim maktabining 9-sinf o'quvchisi G.Ibragimova so'zga chiqib, yosh avlodning barkamol bo'lib voyaga yetishi, bo'sh vaqtini mazmunli tashkil etishi uchun barcha sharoit va imkoniyatlar yaratilayotganini aytib o'tishdi.

– Bugungi tantana kitobsevar o'quvchilar uchun haqiqiy bayramga aylandi. Ziyo maskanining Istiqlol bolalar yozgi dam olish markazida bunyod etilishi, bu yerga tashrif buyurgan bolajonlarning ham ma'nau, ham jismonan hordiq chiqarishlarida ko'mak bo'lishiga ishonamiz, – dedi Respublika axborot-resurs markazi direktori Zulfiya Seytniyazova.

Qadimdan ulug'larimiz «Kitobli uy – oftobli uy», deb bejizga aytishmagan. Kitobdan taralayotgan ziyo oftob singari kishi tafakkurini yoritib, uni to'g'ri yo'lga boshlaydi, ezgu amallar qilishga undaydi. Mazkur ziyo maskani qoraqalpog' yoshlariga uzoq yillar davomida nur ulashishiga ishonchimiz komil.

Ozoda TURSUNBOYEVA

MENING BILIM MASKANIM

Maktabimizda 446 nafar o'quvchi ta'lim-tarbiya oladi.

Ta'lim maskanimizning 3-sinf o'quvchilari fransuz tilidan «Hirondelle» kitobidan foydalanishadi. Fransuz tili ularning sevimli mashg'uloti.

Ustozlarimdan Komila Ismoilova, Jamroxon Mamatqulova, Umida Yoqubovalar bizni bilimli, har tomonlama yetuk bo'lib voyaga yetishimiz uchun turli ma'naviy-ma'rifiy tadbirlar uyushtirib, muvaffaqiyatlarga erishishimiz yo'lida tinmay izlanadilar. Shu bois maktabimiz o'quvchilari «Bilimlar bellashuvi», «Biz giyohvandlikka qarshimiz», «Ogoh va hushyor bo'laylik» tadbirlari va fan olimpiadalarida munosib ishtirok etishyapti.

Men ham doimo a'lo o'qishga, ustozlarim o'g'itlariga amal qilishga intilyapman. Ozod va obod yurtning shunday ta'lim maskanida bilim olayotganimdan cheksiz faxrlanaman.

Sadoqat SOLIJONOVA,
Andijon viloyati, Jalaquduq tumanidagi
30-umumta'lim maktabining 8-sinf o'quvchisi



MEHR BULOG'I

Ona! Kechalari uxlamay bolasiga alla aytib chiqqan bu ulug' zotni qancha ta'riflasak kam.

U allasi bilan farzandi qalbiga ona yurtga mehr-muhabbat tuyg'usini singdiradi. Onalar qalbi quyoshdek taftli. Bu buyuk zot farzandini tarbiyalashda tunlarni tonglarga ulaydi, uning kelajagi porloq bo'lishini o'ylab, tinib-tinchimaydi. Onalar go'zallik va nafosat, vafo va sadoqat, uquv, sabrning timsolidir.

Qalbimiz quyoshi bo'lgan onalarni sevib, ardoqlaylik. Ularga munosib farzand bo'laylik. Xonadonimiz chirog'i hamisha porlab tursin!

Mavluda ISMATOVA,
Qashqadaryo viloyati,
Yakkabog' tumanidagi
35-umumta'lim maktabining
8-«V» sinf o'quvchisi

Har tong uyg'onganimga, derazamga tushayotgan quyoshning nuri ko'nglimni ravshan qiladi. Ko'tarinki kayfiyat bilan badantarbiya qilib, yuz-go'limni yuvgach,



Suyun amaki

Nozimjon maktabdan quvonib chiqib, uyiga oshiqdi. Do'stlarini kutishga ham toqati yetmadi. Tezroq uyiga borib, ustozining gaplarini onasiga yetkazgisi keldi. «Mening oilam» mavzusidagi inshosi a'loga baholanibdi. Ustozi, yanayam ko'proq o'qisang yozuvchi yoki katta shoir bo'lasan, deganida, sinfdoshlari qarsak chalib yuborishdi.

Katta yo'ldan uyi tomon burilganida, yuragi gupillab ura boshladi. Hozir onasi xursand bo'lib, o'zinning aqlli bolam, deb otasiga ham maqtasa kerak. Inshoingni biz ham eshitaylik, deb qayta-qayta o'qitishi aniq.

Hoy bola, bu yoqqa qara... Shirin xayollarga cho'mib ketayotgan Nozimjon bu ovozdan cho'chib tushdi. Hayron bo'lib yon tomonga qaradi. Poliz mahsulotlari sotiladigan do'kon oldida Suyun amaki turardi. Nozimjon amakiga yaqinlashib salom berdi.

Komiljonning o'g'li-san-a? Shundoq muyulishdagi do'kondan bir quti tamaki olib kelib ber. O'zim boray, desam, do'konni qoldirib ketolmayman.

Nozimjon bir lahza nima deyishini bilolmay qoldi. Sotuvchi esa pul uzatib turardi.

Tamaki mahsulotlarini yosh bolalarga sotish

taqiqlangan-ku, amaki.

Meni aysang, indamay beradi, dedi Suyun amaki qo'lidagi pulni Nozimjonning ko'krak cho'ntagiga solib qo'yarkan, tezroq borib kel.


Nozimjon cho'ntagidagi pulni olib amakiga uzatdi.

Boshqa narsani aysangiz, olib kelib beraman. Lekin tamakini emas. Bizning ustozimiz belgilangan qoidalarga qat'iy rioya qilishni doim ta'kidlaydilar.

Suyun amakining jahli chiqdi. Bolaning qo'lidan pulni olib, zarda bilan do'koniga kirib ketarkan:

Otang ishdan qaytayotganida unga aytadigan ikki og'iz gapim bor. Bor, ketaver, dedi.

Nozimjon g'alati bo'lib qoldi. Bir xayoli do'konga yugurib borib kelib, amakini xursand qilgisi kelsa, bir tomondan huquq fani ustozining har qanday sharoitda ham qonunga og'ishmay amal qilish kerak, degan so'zlari qulog'i ostida jaranglaganday bo'lardi. Uning boyagi shashti yo'qolgan, xuddi sudralgudek bo'lib uyga kirib bordi. Hayron bo'lgan onasiga, boshim og'riyapti, dediyu, xonasiga kirib ketdi. Xayolidan esa do'konchi amakining gapi ketmasdi. Otasiga aytasa nima bo'larkin? Otasi ishdan keladigan vaqt ham yaqinlashib qolibdi.



Shular haqida o'ylab yotib, ko'zi ilinganini sezmay qoldi. Bir mahal yo'lakdan otasining ovozi eshitildi.

Shom mahali uxlamasin, uyg'otinglar.

Mazam yo'qroq, deyapti, biroz orom olsin, dedi onasi.

Yo'q, hammamiz birga ovqatlanamiz, muyulishdagi do'konchi Suyun amaki o'g'limizni rosa maqtadi. Irodali, o'z so'zidan qaytmaydigan qilib tarbiyalabsiz. O'zimcha bir sinovdan o'tkazmoqchi edim, muvaffaqiyatli o'tdi, dedi. Nozimjon tursa, nima bo'lganini o'zi aytib berar. Shu Suyun amakining yaxshi odati bor. Bizlarniyam o'quvchilik paytlarimiz goh hisobdan, goh tarixdan imtihon qilib, sinovdan o'tmagarlarga doim pand-nasihatchilardir. Nozimjon shitob bilan o'rmidan turdi. Uning bugun ota-onasiga aytadigan gaplari ko'p...

Yusuf ABDULLAYEV

HUQUQINGIZNI BILASIZMI?

BOBOM DUOLARI SABAB...

Doimgidek chiroyli salom beraman. Bobom esa har galgidek meni erkalab, duo qiladi. Maktabda a'lo baholarga o'qiyman. O'qituvchilarimning maqtovlari, sinfdoshlarimning hurmat bilan qarashlari ko'nglimni tog'dek ko'taradi. Men bularning barchasini bobom qilgan duolar tufayli, deb bilaman.

Uy yumushlariga yordamlashganimdan onam xursand bo'ladi. Tandirda non yopganida, issiq nonning xushbo'y hidi hovlini tutadi. Bularning barchasini zavq bilan kuzatib turgan bobom meni yana alqaydi, o'qishlarimni surishtiradi, kundaligimni tekshirib, o'tilgan mavzular bo'yicha savol-javob qiladi.

Mana shunday chog'larda dono xalqimizning «Oltin olma, duo ol», degan maqolini bot-bot eslayman. Bobomning borligi, oilamiz boshi bo'lib sog'-salomat yurishi biz uchun juda katta davlat ekanligini yurak-yurakdan his qilaman.

Chindan ham qarisi bor uying fayzi ham bo'lak-chalak.

Bobobuvlar biz yoshlarni atrof-dagilarga e'tiborli, mehri, saxovatli bo'lishga o'rgatishadi. Xayrli ishlarning boshida turishadi. Men keksalarini ardoqlagan, e'zozlagan yurt farzandiman. Ota-onam kabi halol mehnat qilib, yoshi ulug' insonlarni qadrlab yashashni, yurt ravnaqi uchun tinimsiz mehnat qilishni istayman. Bobomning ishonchini, albatta, oqlayman.

Iroda RAHMATULLAYEVA,
Samarqand viloyati, Kattaqo'rg'on shahridagi 3-umumta'lim maktabining «Yosh qalamkashlar» to'garagi a'zosi





BUVIJSIGA MUNOSIB BO'LSINI!

(Davomi. Boshi 1-betda)

ZUBAYDA olgan surat

Mana, o'sha xalqimizning ardoqli shoirlari Hamid Olimjon va Zulfiyaxonim yashagan tabarruk xonadon. Darvozadan kirib borar ekanmiz, adibaning kelinlari Riyoaxon aya bizga peshvoz chiqdilar. Yonlarida esa tanish chehra – filmdagi qizaloq bizga kulib turardi.

Poytaxtimizdagi 110-umumta'lim maktabining 3-sinfida a'lo baholarga o'qiyotgan o'quvchi shaxmat o'ynashni yaxshi ko'rar ekan. Onasining aytishicha, aql gimnastikasi deya nisbat beriladigan sportning bu turi bilan Samirabonu bog'cha yoshidan boshlab shug'ullanarkan. Birinchi kubogini ham 5 yoshida bog'chada bo'lib o'tgan bellashuvda olgan. Hozirgacha esa turli musobaqalarda o'nlab medal va diplomlarni qo'lga kiritibdi.

Musiqaqa ham ishtiyuqi baland Samirabonu bizga yaqinda o'rgangan kuyini chalib berdi. Pianino klavishlari ustida yengil harakatlanayotgan barmoqlariga mahliyo bo'lib, qizchanning iste'dodli ekanligiga amin bo'lamiz. Hozirgi kunda Bethoven, Motsart, Chaykovskiy, Glier, Kornelyuk kabi bastakorlar yaratgan asarlarni zo'r mahorat bilan ijro etayotgan yosh iqtidor egasidan ota-onasi, ustozlari Tatyana Chepurnovaning ham umidi katta.

– Nabiramiz hali juda yosh, – deydi Riyoaxon aya nabirasining sochlarini mehr bilan silab. – Avvallari, musiqa ustoziga havas qilib o'qituvchi bo'lgisi kelardi, keyin shaxmat bo'yicha murabbiy bo'laman, deb yurdi. Qanday kasb egasi bo'lishidan qat'iy nazar, eng avvalo, chin ma'noda komil inson bo'lsin! Buvijonisi Zulfiyaxonimga munosib voris, izdosh bo'lsin!

Bizning ham ezgu-niyatimiz shu: iste'dodli o'g'il-qizlarimiz ko'paysin. Zero, yurtimizda yoshlarning puxta bilim olishlari, o'z iqtidorlarini to'laqonli namoyon eta olishlari uchun barcha sharoitlar muhayyo.

F. JALILOVA

KUTUBXONAGA SOVG'A


Poytaxtimizning Chilonzor tumanidagi 270-umumta'lim maktabida o'tkazilgan «Farzandimga kitob sovg'a qilaman» loyihasi asosida tadbir o'tkazildi.

Tadbirda so'zga chiqqan rahbar o'rinbosari Dildora opa Yusupova yoshlar tafakkuri, dunyoqarashi shakllanishida kitobxonlikning ahamiyati kattaligi, bu borada maktab kutubxonasi fondi oyma-oy yangi kitoblar bilan boyib, kitobxonlar sonining oshishiga sabab bo'layotganini alohida ta'kidladi.

Kutubxona mudiri Latifa opa Ergasheva o'quvchilarga kitob tanlashda yaqin ko'makchi.

Tadbirda tashkil etilgan Kitob yarmarkasida sotuvga qo'yilgan 1020 dona kitob o'quvchilar tomonidan xarid qilindi. Shu kuni maktab kutubxonasi kitobxonlar tomonidan sovg'a qilingan 300 ta kitob bilan yanada boyidi.

Muzaffar AHMEDOV



VATAN

Har giyohing shivirlab,
Aytadi sirli alla.
Quloqlarga yoqadi,
Misoli qo'shiq, yalla.

Bobom bosgan izlarning,
Gardi-tuprogi Vatan!
Otam aytgan o'g'itning,
Asl qaymog'i Vatan!

Quchog'ingda yosh avlod,
Mudom bilim olamiz.
Erursan obod chaman,
Bizlar gul-u lolamiz!

NURBEK

ZIYO ULASHIB...

Yaqinda poytaxtimizdagi Respublika markaziy ko'zi ojizlar kutubxonasida «Kitob – mo'jizaga chorlaydi» bayram dasturi tashkil etildi.

Ayniqsa, tadbirning birinchi kuni bolalar uchun qiziqarli kechdi. Respublika ixtisoslashtirilgan san'at maktabi o'quvchilarining turli badiiy chiqishlari, «Yulduz» raqs ansambli ijrosi yig'ilganlarda katta taassurot qoldirdi. Navbatdagi kunda esa maktab o'quvchilarining «Men sevgan mavzu» nomli rasmlar ko'rgazmasi uyushtirildi. Respublika ixtisoslashtirilgan san'at maktabi o'qituvchisi Z. Zufarov bilan davra suhbatlari o'tkazilib, o'quvchilarda musavvirlik ko'nikmalari bo'yicha saboqlar berildi. Respublika qo'g'irchoq teatrlarining spektakli esa bolalarning qizg'in olqishlariga sazovor bo'ldi.

– Toshkent shahri va viloyati hududida yashovchi 4500 dan ziyod ko'rish imkoniyati cheklangan kishilar va ularning oilalariga xizmat ko'rsatuvchi ushbu ziyo maskanimiz ayni paytda shu yo'nalishdagi respublikamiz kutubxonalarini uchun uslubiy markaz sifatida faoliyat yuritadi, – deydi ushbu maskan direktori Mirsardor aka Alimov. – Mazkur tadbir bolalar va ularning oila a'zolari ko'nglida kitobga nisbatan muhabbat uyg'otadi hamda xonadonlarga ma'naviy nurni olib kiradi, deya niyat qilganmiz.

Alisher FAYZULLAYEV



TRAVEL TO MUSEUM

(Muzeysga sayohat)

State Museum of History of Temurids opened in Tashkent on 18 October, 1996. The museum was placed in the centre of Tashkent.

From the early days of its existence, the museum has become a centre of scientific thought and education, its exhibits are of great historical value. These include jewellery, weaponry, military attire and regalia, musical instruments, manuscripts, personal effects of Amir Temur, Babur, astronomical instruments of Ulugbek and many other cultural treasures dating back to the Temurids era.

The inner side of the dome is designed in accordance with the best traditions of the eastern architecture. Decorated with refined ganch-carving it is covered with thin layer of gold leaf.

The building has three floors. The ground floor is allotted for office facilities. The first and second floors are at the disposal of the

museum's exposition.

A big picture in miniature style entitled as Great Temur. The picture reflects the life of Amir Temur from his birth till death.

The depository of the museum keeps over 3 thousand exhibits reflecting the history and culture of Uzbekistan, including the epoch of Amir Temur and Temurids that is subdivided into collections on archeology, architectural de'cor, archeological metal, stone, glass, ethnography,

manuscripts and miniature, golden, silver and bronze wares, dishes, jewelry, ceramic items could serve as the other evidence. For instance, the set of arming tools includes chain armor, helmets, maces, pole axes, various arrowheads, and many other things.




TABLE MANNERS

(Ovqatlanish odobi)

Dear pupils read and learn the useful advices.



Never read while eating.
Do not talk with your mouth full.

If your food is too hot do not blow on it.

Try to make as little noise as possible when eating.

Do not sip (to drink noisily) your soup.

Dinora SHAKIROVA tayyorladi

CHOOSE THE VERBS

(Fe'llarni tanlang)

Fill in the missing verbs in the sentences below. Choose from the following and make sure you use the correct tense of the verb. Use each verb once.

answer	knock	speak
cross	live	understand
fail	paint	wear
join	ride	write

- Do you speak French? Not very well. But I **understand** quite a lot.
- The safest place to ... a busy road is at a pedestrian crossing.
- What color shall we ... the bathroom walls? How about blue or dark green?
- Could I borrow your pen please, Jasur? I have just got to ... this document.
- ... on the door to see if there's anybody at home.
- You have to be over eighteen to ... this club.
- I usually ... jeans and a t-shirt at the weekend.
- My brother has never learnt to ... a bicycle. He tried once, fell off, and has never tried since.
- Did you pass your exam? No, I ...
- Try to ... all questions, the teacher told the students before the test started.
- Madina ... in Tashkent now, but she was born in Bukhara.
- My cousin can ... five languages fluently.

Ibrohim FAYZIRAHMONOV

THE RESOURCEFUL GAME

(Topqirlik o'yini)


Resolve the following rebus.
Find the names of these things in English and put together head letters to make a new word.



Risolat ISMOILOVA

CROSSWORD

The crossword of antonyms or couple words (Juft yoki antonim so'zlar krossvordi).



- Sell
- After
- Question
- Famous
- Thin
- End
- Unsafety
- Answer
- Big.

Nozima YO'LDOSHEVA,
O'zDJTU qoshidagi
1-akademik litsey o'quvchisi

Istiqlolning iste'dodlari

Ochil TOHIR HUSHYOR BOLA

- Qilinmagan ish uchun,
Jazo loyiqmi, ustoz?
- Yo'q, albatta, sen nechun
Qiziqib qolding, Mumtoz?!
- Men uy vazifasini,
Bugun bajarmagandim.
Bilay, deb jazosini,
Shu uchun so'ragandim.

Makta-
bimizda
adabiyotga
ixlosmand o'quvchi-
larni o'zida jamlagan
«Istiqlol g'unchalari»
to'garagi faoliyat
ko'rsatadi.

TAJRIBA

O'quvchilarga qarab
Ustoz der: - Shuni biling,
Olmada temir serob,
Ko'proq iste'mol qiling.
Bilag'on sanab o'zin,
O'rnidan turib Akrom,
Bo'lib der ustoz so'zin:
- Ishonmayman sira ham.
Bu to'g'ri emas, axir...
Daraxtlar aro kezib,
Ular ustidan bir-bir,
Ko'rdim magnit yurgizib.
Sinab ko'rdim erinmay,
Tajribamdan o'tmadi.
Men qanchalik urinmay,
Olma qilt ham etmadi.



G'URUR

Orzular ushalsa, osmon bo'ladi,
Dil dilga qo'shilsa, ummon bo'ladi.
Ezgu bir niyatni ko'zlagan kishi,
Eng suyuq, himmatli inson bo'ladi.

Insonlar qalbida mehr jo'sh ursin,
Hamisha ko'zlari quvonchga to'lsin.
Bu yurtda yashagan har bir insonning,
Yuksalsin g'ururi, iqboli kulsin.

Nasiba JO'RABOYEVA

Vatan madhi

Bog' oralab yursam ayni chog',
Mayin shamol yelpidi yuzim.
Ilhom jo'shib, Vatan haqida
She'rilar bitdim, aytdim dil so'zim.

Yulduz OTABOYEVA

GULLAGAN GULISTONIM

Surxondaryom, surxonim,
Men tug'ilgan makonim.
Bag'ringda ulg'aydim shod,
Yashnagin bo'lib obod.

Surxondaryom, surxonim,
Gullagan gulistonim.
Sen jannatning o'zisan,
Onam shirin so'zisan.

Shoshilib oqar, qarang,
Toshqin daryo To'palang.
Bordir Amudaryosi,
Tengsiz mehr ziyosi.

Tog'laridir purviqor,
Bir yonda bobo Hisor.
Surxonim tabiati,
Yer yuzida ulug'vor.

Ahror ESHMAMATOV,
Surxondaryo viloyati,
Denov tumanidagi
41-umumta'lim maktabining
6-«A» sinf o'quvchisi

GULLARNING BALIG'I

Bo'g'ziga qadar doim,
Suvning ichida turar.
Jilmayganicha muloyim,
Gap boshlaydi Nilufar:

- Soyda cho'milsa odam,
Yayrar tana borlig'i.
Bo'lib tetik va bardam,
Yaxshililar sog'lig'i.

Chindan ma'qul menga ham,
Nilufarning qiligi.
Sizga ta'rifin aytsam,
U gullarning baligi.

RASMLAR

- Surat, qalamlar qani,
Rasm darsi-ku erta?!
Men gullarning rasmini,
Chizishim shart, albatta.

Xunobi oshib Zokir,
Baqirar ukasiga.
Bilag'on mitti Shokir,
Shunday der akasiga:

- Bekorlikdan zerikib,
Osmon sari uchibdi.
Ham o'zaro birikib,
Ko'k betini quchibdi.

Ishonmasangiz, qarang,
Bo'yalgan osmon-falak.
Ko'kni bezab yetti rang,
Chiqqan edi kamalak.



Jajji
fantastika

O'qidingizmi, gazetada yangi noan'anaviy bog' ochilgani haqida yozishibdi. Nomi «Elektronika bog'i» ekan. Doimo muxlislar bilan gavjum bu bog'da kompyuter, telefon kabi insoniyatni o'ziga tez jalb qiladigan daraxtlar bor emish. Kompyuter daraxti turli xil mevalarni bir vaqtning o'zida tugib, hosil berayotgani hayratlanarli. Ammo uning kamchiligi ham yo'q emasligi bilindi. Mevaga ba'zan qurt tushib turarkan. Qizig'i shundaki, odamlar qurtlagan mevalarni ham ko'ra-bila turib, iste'mol qilishayotganmish.

Ayniqsa, telefon nomli daraxt yosh-u qarining e'tiborida. Unda SMS guli ochilganmish. Hididan yoshlar ko'proq mast bo'lib, iforiga juda tez o'rganib qolisharkan. Bu esa bora-bora surunkali SMS kasalligini keltirib chiqarar ekan. Yoshlarning ota-onasi esa bu kasallikka qarshi kurashish va uning oldini olish choralarini qidirish bilan ovora. Biroq haligacha kasallikning aniq davosi topilmayotgan ekan. Aytishlaricha, har sohada me'yor, qat'iy iroda va barcha imkoniyatlardan umumiy foydalanish yo'li bilangina bu kasallikdan qutulish mumkin ekan. Maqolada undan xalos bo'lganlar soni ortib borayotgani haqida ham yozilgan.

Gavhar JABBOROVA,
ToshPTI qoshidagi akademik litseyning
2-bosqich o'quvchisi

BIZLAR JUDA QUVNOQMIZ

Zukko o'g'il-qizlarmiz,
Quyoshdayin porloqimiz.
Dunyoda tengi yo'qmiz,
Bizlar juda quvnoqmiz.

Juda chaqqon, epchilmiz,
Doim zafar quchamiz.
Kuchga to'lgan kunimiz,
Osmonlarga uchamiz.

Xalqimizning yuzini,
Doim yorug' qilamiz.
Yurtimiz bayrog'ini,
Samolarga ilamiz.

Mehribonu ABDURAZZOQ qizi,
Toshkent shahri,
Yashnobod tumanidagi
307-umumta'lim maktabining
5-sinf o'quvchisi

QILICHBOZLIK jahon chempionati yakunlandi

Joriy yil aprel oyining birinchi o'n kunligida poytaxtimizda kadetlar va yoshlar o'rtasidagi qilichbozlik bo'yicha jahon chempionati bo'lib o'tdi.

Mazkur bellashuvda yosh qilichbozlar nafaqat o'z imkoniyatlarini sinovdan o'tkazishdi, balki do'stona aloqalarni ham o'rnatishdi. Musobaqaning boshida hamyurtlarimizdan bir guruhi imkoniyatni boy berishdi. Kadetlar va yoshlar o'rtasidagi jahon chempionati bahslari davom etar ekan, ayollar o'rtasida rapira va erkaklar o'rtasida shpaga yo'nalishi bo'yicha bellashuvlarda kuchli 32 talikka kira olgan qilichbozlar orasida jang qilishga muvaffaq bo'lgan sportchimiz Javohir Nurmatorovning borligi bizni quvontirdi. U britaniyalik Xarrison Nikolsga yengilgan bo'lsa-da, nufuzli musobaqalarda birinchi marta ishtirok

etayotgan vakilimiz uchun bu jarayon katta tajriba vazifasini o'tadi. Shuningdek, 17 yoshgacha bo'lgan yosh qilichbozlar o'rtasidagi rapira bellashuvlarida AQSHdan Samuel Moelis 1-o'rin, rossiyalik Grigoriy Semenyuk 2-, Samuelning yurtdoshi Jeffri Turett va vengriyalik Tamash Mesarosh uchinchi o'ringa munosib topildi. Qizlar o'rtasidagi bellashuvlarda rossiyalik Olga Nikitina bosh sovrinni qo'lga kiritdi. U oltin medal uchun kechgan bahsda italiyalik Lyuchiya Lucharinini mag'lubiyatga uchrata oldi. Yaponiyalik Misaki Emura hamda yana bir rossiyalik sportchi Aleksandra Klimova shohsupaning uchinchi pog'onasidan joy oldi.



Jahon chempionatining oxirgi bahsida oltin medalga da'vogarlik qilgan yetakchi italiyalik yigitlar jamoasi so'nggi finalni ham o'z foydasiga hal etdi. Xitoyliklar 2-, farang yigitlari esa 3-o'rinni egallashdi.

O'z muxbirimiz



Sport turlarini sanaganimizda, jun-ri-do terminiga ko'zimiz tushadi. Ba'zilar uchun tanish bo'lmagan kelganiga o'n besh yil bo'ldi. Shu davr mobaynida yoshlar o'rtasida ommalashgan ushbu sport mashg'ulotlarida bugungi kunda yurtimizda o'g'il-qizlarni uchratishimiz mumkin.

ANA BELLASHUV - MANA BELLASHUV



Yaqinda Toshkent davlat Vestminster universiteti sport majmuasida jun-ri-do bo'yicha musobaqa nihoyasiga yetdi. «Sog'lom avlod uchun» Xalqaro xayriya fondi kubogi uchun tashkillashtirilgan mazkur musobaqada 200 nafardan ziyod sportchilar ishtirok etdi. Musobaqada JAS, Timur, NUR, Taychi kabi qozog'istonlik sport klublari a'zolarining ishtiroki bellashuvlarining keskin va murosasiz o'tishini ta'minladi. Ikki kun davom etgan musobaqada yosh doirasida g'oliblar aniqlandi. Jumladan, 6 - 7 yoshlilar o'rtasida 1-o'rin Ramzxo'ja Rahmatxo'jayevga nasib qilgan bo'lsa, Mirodil Turg'unov va Radion Vuxolov 2-, 3-o'rinlarni zabt etishdi. 9 - 10 yoshlilar o'rtasida Riyat Yanoruyev birinchi, Mirsamir Miryoqubov ikkinchi, Fazliddin Bo'riyev uchinchi o'rinlarni egallashdi. Shuningdek, Sanjar Sultonov, Firdavs Tohirov hamda Aziz Murodxonovlar 11 - 12 yoshlilar doirasida uch o'ringa munosib topildi.

NURBEK

Samarqand viloyati, Payariq tumanidagi 3-bolalar va o'smirlar sport maktabida sport gimnastikasi o'quv guruhi tashkil topganiga hali uzoq vaqt bo'lgani yo'q.

YANGI G'ALABALAR SARI

Mirzod Elmurodov murabbiyligida guruh tarbiyalanuvchilari bugungi kunga qadar qator yutuqlarni qo'lga kiritishga ulgurishdi. Joriy o'quv yilida to'garak faollari «Umid nihollari» sport musobaqasining tuman bosqichida 1-o'rinni egallab, viloyatga yo'llanma olishdi. bosqichida 1-o'rinni egallab, viloyatdagi 42-ixtisoslashtirilgan sport maktabida 1-o'rinni egallab, viloyatga yo'llanma olishdi. 2015-yilning 22 - 24-mart kunlari Samarqand shahridagi 42-ixtisoslashtirilgan sport maktabida 1-o'rinni egallab, viloyatdagi 42-ixtisoslashtirilgan sport maktabida 1-o'rinni egallab, viloyatga yo'llanma olishdi. 2015-yilning 22 - 24-mart kunlari Samarqand shahridagi 42-ixtisoslashtirilgan sport maktabida 1-o'rinni egallab, viloyatdagi 42-ixtisoslashtirilgan sport maktabida 1-o'rinni egallab, viloyatga yo'llanma olishdi.

Shukrulla G'ULOM, Gulandom UMAROVA



AKA-UKA GIMNASTIKACHILAR

Bahorning iliq, farahbaxsh kunlaridan biri. Avtobusda odam ko'p. Bolalar nashrida ishlashim bois, diqqatimni oq ro'mol o'ragan nuroniy onaxonning ikki nafar shiringina nevaralari bilan suhbat o'ziga tortdi.

Ularni avval ham bir necha bor uchratgandim. Bu safar esa yaqindan tanishishga jazm etdim. Xolida aya Ahmedova nabiralarni poytaxtimizning Mirobod tumanidagi 14-bolalar va o'smirlar sport maktabi gimnastika mashg'ulotlariga olib ketayotgan ekan. Nabiralarning kattasi Husniddin Nuriddinov poytaxtimizning Yakkasaroy tumanidagi 89-umumta'lim maktabining 2-«G» sinfida o'qir ekan. Olti yoshli Muhiddin ham akasiga havas qilib, yetti oydan beri mazkur sport maktabida murabbiyi Nozigul Murodjonova bilan shug'ullanayotgan ekan.



To'rt yildan buyon Bobir aka Olimovdan sport gimnastikasi bo'yicha saboq olib kelayman, deydi Husniddin. Bir necha musobaqalarda qatnashib, diplom va medallar sohibi bo'ldim. Yaqinda Navro'z bayrami munosabati bilan shahar miqyosida o'tkazilgan musobaqada ikkinchi darajali diplom bilan taqdirlandim. Endi esa 13-15-aprel kunlari Navoiy shahrida bolalar va o'smirlar o'rtasida o'tkaziladigan musobaqaga tayyorgarlik ko'ryapman. Nabiralarim kelgusida mohir sportchilar bo'lib, xalqaro musobaqalarda qatnashib, O'zbekistonimiz sharafini munosib himoya qilishsa, deb niyat qilaman, deya suhbatga qo'shildi buvi. Niyatingiz amalga oshsin. Nevaralarining kelgusida sog'lom, barkamol, yetuk insonlar bo'lib kamol topishi, porloq kelajagi uchun qayg'uradigan sizdek bobo-momolarimiz omon bo'lishsin! Suhbatdoshlarim bilan xayrlashar ekanman, ularga sihat-salomatlik, Husniddinga esa Navoiy shahridan zafar quchib qaytishini tiladim.

Dilorom HOTAMOVA, muallif olgan surat

«ONAJONIM TABIAT» insholar va rasmlar tanloviga

Qorachiqda asraymiz seni

Assalomu alaykum! Sizlarga maktabimiz qoshida tashkil etilgan tasviriy san'at to'garagi a'zolari nomidan maktub yo'llamoqdamiz.

To'garak rahbari Muzaffar aka Begmatov mashg'ulotlar jarayonida bizga tasviriy san'at sirlarini o'rgatish bilan birga, ekologiya mavzusida tushunchalar beradi hamda muntazam ijodiy ishlar ko'rgazmasi tashkil etiladi. Biz ularda faol ishtirok etishga harakat qilamiz.

Gazeta sahifalarida «Onajonim tabiat» tanlovi e'lon qilingach, ustozimiz uning maktab bosqichini o'tkazdi. Rasmlar ichidan eng saralarini tanlab oldik va sizning e'tiboringizga havola etmoqdamiz.

Biz tasvirlagan rasmlardagi nojo'ya tasvirlar




Diyora HAMIYEVA

xatti-harakatlar haqidagi o'quvchilarga o'z ijobiy ta'sirini o'tkazib,



Oydin ULUG'OVA



Mirkomil HOSILOV

tabiatga o'zgacha mehr-muhabbat bilan munosabatda bo'lishar, degan umiddamiz. Ushbu tasvirlar orqali ona tabiatni asrashga o'z hissamizni qo'shamiz, deb:

**Feruz OTAQULOVA (4-«A» sinf),
Mirkomil HOSILOV (6-«B» sinf),
Diyora HAMIYEVA (7-«A» sinf),
Oydin ULUG'OVA (9-«A» sinf),
Samarqand viloyati,
Qo'shrabot tumanidagi
68-umumta'lim maktabi
o'quvchilari**



Feruz OTAQULOVA

Qiz bolaga, qirq hunar ham oz, deb bejiz aytishmagan. Shu bois bo'lsa kerak, izlanuvchan, iqtidorli, hamma ishga sidqidildan yondashuvchi, hunarli qizlar kun sayin ortib bormoqda.

MAKTABDA KARVING SAN'ATI

Bu esa, ota-onalar hamda ustozlarni birdek quvontiradi. Lobarxon Mahmudmurodova Toshkent shahar, Sergeli tumanidagi 277-umumta'lim maktabining 9-sinfida tahsil oladi. Bolaligidan ona tili va adabiyot faniga juda qiziqadi. O'qishlari a'lo, dugonalari unga havas bilan qarashadi. Chunki u karving san'ati bilan shug'ullanadi. Maktabdagi to'garakka qatnashib, ustoz

Zamira opadan bu san'atning sir-asrorlarini mukammal o'rganmoqda. Nafaqat meva va sabzavotlardan, balki sovun, sham kabi mahsulotlardan ham turli xildagi san'at asarlarini yaratmoqda. Eng muhimi, Lobar o'zi o'zlashtirib olgan hunarini dugonalariga ham o'rgatmoqda. Biz Lobarxonga omad tilab, o'z ishining ustasi bo'lishi, ko'zni quvnatadigan ko'plab ijod namunalari yaratishini kutib qolamiz.

Manzura UBAYDULLAYEVA

Bilasizmi?

KOALA - ATIQNING BIR TURIMI?



Koala bolasi ko'rinishidan ayiqni eslatsa-da, aslida bunday emas. U uzoq qarindoshlari - kenguru, vombat, vallabi va opossumlar bo'lgan xaltali hayvonlar turiga kiradi.

OCHLIKKA BARDOSHLI REKORDCHI




Imperator pingvinlari palapon ochilishini ovqatsiz 130 kun kutib o'tirishi bilan ochlikka chidamli tuyalarni dog'da qoldirar ekan. Lekin taxtana 2 yil, biy o'rgimchak 2,5 yil ovqat yemay yura olishi mumkin. Eng oddiy botqoq toshbaqasi esa ochlikka 5 yil chiday olar ekan. Ha, mana buni rekord, desa bo'ladi.

Dilfuza NIZOMOVA, Nodira NAZAROVA

Gazetamizning 14-sonida chop etilgan «QORAQALPOG'ISTON» krossvordining javoblari:

1. Qush.
2. Ona.
3. Rubob.
4. Anor.
5. Qo'l.
6. Anhor.
7. Lola.
8. Paxta.
9. Orol.
10. G'olib.
11. Injiq.
12. Suv.
13. Tanka.
14. Oltin.
15. Nukus.

BO'SH O'TIRMA, BOSH QOTIR!



MAQOLNI O'QING-CHI!

Chizmadagi aylanalardan bosh harfni topib, harflarni ketma-ket o'qing. Bunda ulardan o'zbek xalq maqollaridan birini bilib olasiz.

Husan ORIPOV tuzdi

8

13-aprel 2015

Bosh muharrir
Feruz ADILOVA

TAHRIR HAY'ATI:
Omonulla YUNUSOV,
Abdug'ani XOLBEKOV,
Bahodir G'ANIYEV,
Svetlana INOMOVA,
Murtazo SULTONOV,
Zoir ISAJONOV,
Vahobjon RAJAPOV,
Zikrilla TESHABOYEV,
Feruz JALILOVA,
Feruz MATYOQUBOV
(mas'ul kotib)

Navbatchi
muharrir
Dilorom
HOTAMOVA
Rassom
Feruzbek
KAMOL o'g'li

Manziliimiz:
Toshkent shahri,
Navoiy ko'chasi, 30-uy.
Indeks: 100129.
Obuna indeksi: 198.
e-mail:
info@tongyulduzi.uz
www.tongyulduzi.uz

Tel./faks: 244-63-08
Tel./faks:
(99871) 244-38-10

«O'zbekiston»
NMIUda chop etildi.
Tahririyatga kelgan barcha
qo'lyozmalar tahrir qilinadi,
mualliflarga qaytarilmaydi.
Haftaning dushanba kuni
chiqadi.
Shakli A-3, 2 bosma taboq.
ISSN 2010-6092
Adadi - 48145
Buyurtma - S 2642

Muassislar:

O'zbekiston Matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati
Markaziy Kengashi,
«SOG'LOM AVLOD UCHUN» hukumatga
qarashli bo'lmagan xalqaro xayriya fondi.

Gazeta O'zbekiston Matbuot
va axborot agentligida
0208-raqam bilan 2007-yil
2-fevralda ro'yxatdan o'tgan.